

Specijalni izaslanik za Mostar donio arbitražnu odluku o Hercegovačkoj radio-televiziji

Specijalni izaslanik visokog predstavnika za Mostar, gospodin Norber Winterstein, je danas donio arbitražnu odluku o Hercegovačkoj radio-televiziji Mostar (HRT).

Gospodin Winterstein je donio odluku da grad Mostar i dalje treba subvencionirati HRT u istom mjesecnom iznosu koji je utvrđen budžetom za 2006. godinu i da će takav aranžman biti na snazi do 31. marta 2007. godine.

U međuvremenu, grad Mostar i upravni odbor i rukovodstvo HRT-a moraju poduzeti sve potrebne mjere kako bi izvršili prenos vlasništva nad HRT-om na druge nivoe vlasti, javne institucije ili prenos vlasništva putem privatizacije.

Ukoliko ovo pitanje prenosa vlasništva ne bude riješeno do 31. marta 2007. godine, pristupiće se stečajnom postupku ili likvidaciji u skladu s zakonima koji se primjenjuju na ovu oblast.

Grad Mostar može odlučiti da podijeli HRT na dva pravna subjekta, odnosno na radio i televizijsku stanicu. Ukoliko se odluči na ovakav potez, grad Mostar do 31. marta 2007. godine mora osigurati propisnu registraciju ova dva pravna subjekta kod nadležnog suda.

U objašnjenju koje se nalazi u prilogu Odluke, gospodin Winterstein je jasno istakao da će svako prolongiranje ovih rokova smatrati neprihvatljivim i napomenuo da se o pitanju HRT-a detaljno razgovaralo još od stupanja na snagu Statuta grada Mostara u januaru 2004. godine, ali da nije donesena nikakva odluka.

Gospodin Winterstein je dodao da je pažljivo razmotrio ekonomski i pravne posljedice koje bi nastupile ukoliko bi ova stanica i dalje ostala u vlasništvu grada Mostara. Zaključio je da bi grad Mostar mogao osigurati daljnji rad stanice samo ukoliko bi osigurao novi kapital i ponovno ulaganje sredstava u stanicu odnosno reinvestiranje, garantirao godišnje subvencije i servisirao svoj dug.

To bi bilo izvan finansijskih mogućnosti grada Mostara.

Grad Mostar već ima obavezu da financira otpremnine za višak radnika, reorganizira javna preduzeća koje pružaju usluge građanima kako bi ona nastavila s radom, investira u osnovnu infrastrukturu i rekonstrukciju. Pored svega ovoga grad Mostar jednostavno ne može sebi finansijski priuštiti daljnje održavanje i rad HRT-a. Nastojanja da se to učini bi dovela u pitanje finansijsku održivost grada Mostara.

Međutim, gospodin Winterstein je odlučio da bi bilo nepravdено zatvoriti ovu stanicu i odmah započeti likvidaciju preduzeća, iako je to pravno moguće. HRT ima legitimnu ulogu u službi hrvatske kulture i jezika u Hercegovini. Iz tog razloga je specijalni izaslanik u svojoj Odluci ostavio mogućnost ovoj stanci da izvrši restrukturiranje svoje administracije i vlasništva. Oni koji žele da HRT nastavi pružati svoje usluge mogu do 31. marta 2007. godine ponuditi rješenja zasnovana na privatnom ulaganju ili na proširenoj ulozi za druge organe vlasti.

Visoki predstavnik Christian Schwarz-Schilling je 14. septembra imenovao gospodina Wintersteina za svog specijalnog izaslanika za Mostar u skladu s Odlukom o implementaciji reorganizacije Grada Mostara, a njegov mandat traje do kraja 2006. godine.

Gospodin Winterstein je dobio zadatku da pronađe rješenje za pitanje HRT-a, kao i da radi na objedinjavanju javnih preduzeća koja pružaju usluge građanima i pomogne na poduzimanju svih potrebnih mjera za finaliziranje procesa imenovanja državnih službenika.